



ՀԵՌՈՒՍՏԱՏԵՍՈՒԹՅԱՆ ԵՎ ՌԱԴԻՈՅԻ ՀԱՆՁՆԱԺՈՂՈՎ

ՈՐՈՇՈՒՄ

22 հունիսի 2021 թվականի թիվ 107- Ա

ք. Երևան

«ԷՖ ՆԵԹ» ՄՊ ԸՆԿԵՐՈՒԹՅԱՆ ՆԿԱՏՄԱՄԲ ՎԱՐՉԱԿԱՆ ՏՈՒՅԺ ԿԻՐԱՌԵԼՈՒ ՄԱՍԻՆ

Հեռուստատեսության և ռադիոյի հանձնաժողովն (այսուհետ՝ Հանձնաժողով) ուսումնասիրելով դիմումի հիման վրա 2021 թվականի մայիսի 03-ին հարուցված թիվ 7 վարչական վարույթի նյութերը՝ *պարզեց*.

2021 թվականի մայիսի 03-ին Հանձնաժողով մուտքագրված «ՎԻ ԷՄ ՏԵԼԵՊՐՈՋԵԶԹ» ՄՊ ընկերության (այսուհետ՝ դիստրիբյուտոր) դիմումում նշված է ցանցային օպերատորի գործունեություն իրականացնող «ԷՖ ՆԵԹ» ՄՊ ընկերության (այսուհետ՝ ցանցային օպերատոր) կողմից տեսալսողական ծրագիրն առանց պայմանագրի վերահաղորդելու փաստի վերաբերյալ:

Դիստրիբյուտորը Հանձնաժողով 2021 թվականի մայիսի 03-ին մուտքագրված դիմումով տեղեկացրել է, որ հանդիսանում է թվով 28 տեսալսողական ծրագրերի դիստրիբյուտորը, մասնավորապես՝ 1. «Setanta Sports Eurasia», 2. «Setanta Sports Eurasia Plus», 3. «Animal Planet», 4. «Discovery Channel», 5. «Discovery Science», 6. «DTX», 7. «Fine Living HD», 8. «Food Network HD», 9. «Investigation Discovery («ID XTRA»)», 10. «TLC», 11. «Travel Channel HD», 12. «Eurosport 1», 13. «Eurosport 1 HD», 14. «Eurosport 2», 15. «Eurosport 2 HD», 16. «PTP-Планета», 17. «Россия-К», 18. «Россия-24», 19. «TNT-Comedy», 20. «TNT4 International», 21. «Friday International», 22. «TB 3 International», 23. «HTB Сериал», 24. «HTB Право», 25. «HTB Стиль», 26. «Animal Planet HD», 27. «Discovery Channel HD», 28. «TLC HD» տեսալսողական ծրագրերի, այս տեղեկատվությունը ներառված է նաև Հանձնաժողովի պաշտոնական կայքում:

Դիստրիբյուտորը դիմումում նշել է նաև, որ նշված տեսալսողական ծրագրերը ՀՀ տարածքում վերահաղորդման իրավունքով տարածելու իրավունքը պատկանում է իրեն, սակայն ունենալով որոշ կասկածներ ցանցային օպերատորի կողմից՝ առանց պայմանագրի վերահաղորդվող տեսալսողական ծրագրի մասին, համապատասխան տեղեկություն ստանալու նպատակով հարցում է ուղարկել Հանձնաժողով:

Հանձնաժողովը 2021 թվականի ապրիլի 14-ի թիվ 04-326 գրությամբ տրամադրել է տեղեկություն՝ Հայաստանի Հանրապետությունում գործող ցանցային օպերատորների կողմից վերահաղորդվող այն տեսալսողական ծրագրերի մասին, որոնց դիստրիբյուտորը հանդիսանում է «ՎԻ ԷՍ ՏԵԼԵՊՐՈՋԵՔԹ» ՍՊ ընկերությունը և ըստ այդ տեղեկության «ԷՖ ՆԵԹ» ՍՊ ընկերության կողմից վերահաղորդվում է նաև «Россия-24» տեսալսողական ծրագիրը:

Դիստրիբյուտորը դիմումով տեղեկացնում է նաև, որ 2021 թվականից դադարել է իր և ցանցային օպերատորի միջև «Россия-24» տեսալսողական ծրագրի վերահաղորդման իրավունքի տրամադրման պայմանագիրը և պայմանագրի գործողության ժամկետը չի երկարաձգվել, հետևաբար ցանցային օպերատորի կողմից՝ առանց համապատասխան իրավական հիմքերի (պայմանագրի), վերահաղորդվում է դիստրիբյուտորին պատկանող «Россия-24» տեսալսողական ծրագիրը:

Հանձնաժողովը ղեկավարվելով «Վարչարարության հիմունքների և վարչական վարույթի մասին» օրենքի 30-րդ հոդվածի 1-ին մասի ա) կետով և հիմք ընդունելով դիստրիբյուտորի դիմումը՝ 2021 թվականի մայիսի 03-ին ցանցային օպերատորի նկատմամբ հարուցել է վարչական վարույթ:

Հանձնաժողովը հարուցված վարչական վարույթի մասին 2021 թվականի մայիսի 05-ին ծանուցել է ցանցային օպերատորին և հայտնել, որ այս հարցի վերաբերյալ կարող են ներկայացնել իրենց պարզաբանումները, բացատրությունները:

Հարուցված վարչական վարույթի ընթացքում ցանցային օպերատորի կողմից որևէ պարզաբանում, բացատրություն և տեսալսողական ծրագրերի վերահաղորդման իրավական հիմքերը Հանձնաժողով չի ներկայացվել:

Հանձնաժողովը ղեկավարվելով «Տեսալսողական մեդիայի մասին» օրենքի 32-րդ հոդվածի 1-ին մասի 14-րդ կետով և 42-րդ հոդվածով, համաձայն որի՝ Հեռարձակողների գործունեության մշտադիտարկումն իրականացվում է ուղղակի դիտարկման, իսկ օպերատորի դեպքում՝ նաև տեղում դիտարկում իրականացնելու միջոցով և հիմք ընդունելով Հանձնաժողովի նախագահի 2021 թվականի մայիսի 31-ի թիվ 15-Ս հրամանը՝ իրականացրել է ցանցային օպերատորի մոտ մշտադիտարկում՝ տեղում դիտարկում իրականացնելու միջոցով:

Տեղում դիտարկում իրականացնելու արդյունքում 2021 թվականի հունիսի 09-ին Հանձնաժողովի կողմից կազմվել է արձանագրություն, համաձայն որի՝ ցանցային օպերատորն իր գործունեությունն իրականացնում է մալուխային՝ անալոգային (76 տեսալսողական ծրագիր) և թվային (81 տեսալսողական ծրագիր) հեռարձակման ցանցի միջոցով, և IPTV ձևաչափով (102 տեսալսողական ծրագիր): Ցանցային օպերատորի բոլոր երեք ենթակառուցվածքներում ժամը՝ 11:30-12:00-ն իրականացված մշտադիտարկման արդյունքում պարզվել է, որ ցանցային օպերատորի կողմից չի վերահաղորդվում «Россия-24» տեսալսողական ծրագիրը:

Հանձնաժողովի հիմնավորումները (պատճառաբանությունը) և եզրահանգումը.

Այսպիսով, վարչական վարույթի բազմակողմանի, լրիվ և օբյեկտիվ քննության, ձեռք բերված ապացույցների ուսումնասիրության և գնահատման արդյունքում Հանձնաժողովն ամրագրում է հետևյալը.

Համաձայն «Տեսալսողական մեդիայի մասին» օրենքի 32-րդ հոդվածի 1-ին մասի 14-րդ կետի՝ Հանձնաժողովը՝ իրականացնում է Հեռարձակողների և օպերատորների գործունեության մշտադիտարկում:

«Տեսալսողական մեդիայի մասին» օրենքի 42-րդ հոդվածի 1-ին և 3-րդ մասերը սահմանում են.

«1. Հեռարձակողների գործունեության մշտադիտարկումն իրականացվում է ուղղակի դիտարկման, իսկ օպերատորի դեպքում՝ նաև տեղում դիտարկում իրականացնելու միջոցով: Ուղղակի դիտարկման արդյունքները կարող են համադրվել տեսալսողական հաղորդումների հաշվառման էլեկտրոնային մատյանների տվյալներին:

3. Տեսալսողական մեդիայի մասին օրենսդրության պահանջների խախտման վերաբերյալ տեղեկություններ ունենալու դեպքում օպերատորի գործունեության տեղում դիտարկումն իրականացվում է կարգավորող պետական մարմնի նախագահի հրամանի հիման վրա»:

«Տեսալսողական մեդիայի մասին» օրենքի 49-րդ հոդվածի 1-ին մասի համաձայն՝ Հայաստանի Հանրապետության տարածքում և նրա սահմաններից դուրս գործող Հեռարձակողների տեսալսողական ծրագրերը ցանցային օպերատորի լիցենզիա ստացած անձի կողմից կարող են վերահաղորդվել տեսալսողական ծրագրերի դիստրիբյուտորի կամ հեռարձակողի հետ պայմանագրի հիման վրա:

Հանձնաժողովի կողմից ուսումնասիրվել է վարչական վարույթի մասնակիցների կողմից ներկայացված փաստերը, որոնք համադրվել են Հանձնաժողովի տեղում դիտարկման արդյունքներին և «Տեսալսողական մեդիայի մասին» օրենքի 49-րդ հոդվածի 1-ին մասի խախտում չի հայտնաբերվել:

Սակայն, Տեսալսողական մեդիայի մասին» օրենքի 49-րդ հոդվածի 5-րդ մասը սահմանում է.

Վերահաղորդվող տեսալսողական ծրագրերի յուրաքանչյուր փոփոխության վերաբերյալ ցանցային օպերատորը տեղեկացնում է կարգավորող պետական մարմնին:

Այսպիսով, վարչական վարույթի նյութերի ուսումնասիրության և համադրման արդյունքում Հանձնաժողովն ամրագրում է, որ Օրենքով ցանցային օպերատորների համար պարտավորություն է սահմանված՝ վերահաղորդվող տեսալսողական ծրագրերի յուրաքանչյուր փոփոխության վերաբերյալ Հանձնաժողովին տեղեկացնելը, որը սակայն ցանցային օպերատորի կողմից չի պահպանվել («Россия-24» տեսալսողական ծրագրի վերահաղորդման պայմանագրի ժամկետը լրանալու և այն չերկարձգելու վերաբերյալ), դրանով իսկ խախտելով Օրենքի 49-րդ հոդվածի 5-րդ մասի պահանջը:

Փաստում ենք նաև, որ ցանցային օպերատորը վերահաղորդում է տեսալսողական ծրագրեր և պարտավոր է պահպանել տեսալսողական մեդիայի բնագավառը կարգավորող օրենսդրության պահանջները, իսկ օրենքի դրույթները խախտելու դեպքում կրել պատասխանատվություն օրենքով սահմանված կարգով, ուստի, օրենքի պահանջի չկատարումն ինքնին բերում է պատասխանատվության:

Ցանցային օպերատորը պետք է հաշվի առնի, որ օրենքներով հստակ սահմանվում են իրավական նորմեր, որոնց չպահպանելը առաջացնում են իրավական հետևանքներ և Ցանցային օպերատորը պատասխանատվություն է կրում տեսալսողական մեդիայի ոլորտը կարգավորող օրենսդրության կիրառման ապահովման համար և տվյալ դեպքում ցանցային

օպերատորը պարտավոր էր պահպանել Օրենքի 49-րդ հոդվածի 5-րդ մասով սահմանված դրույթի պահանջը:

«Տեսալսողական մեդիայի մասին» օրենքի 55-րդ հոդվածի 1-ին մասի համաձայն՝ Կարգավորող պետական մարմնի կողմից տեսալսողական մեդիայի բնագավառը կարգավորող օրենսդրության պահանջների խախտման դեպքեր հայտնաբերվելու, ինչպես նաև պետական այլ մարմինների կողմից իրենց իրավասությունների շրջանակում տեսալսողական մեդիայի բնագավառը կարգավորող օրենսդրության պահանջների խախտման դեպքեր հայտնաբերվելու և դրանց մասին կարգավորող պետական մարմնին գրավոր տեղեկացվելու դեպքում կարգավորող պետական մարմինը կիրառում է հետևյալ վարչական տույժերը.

- 1) գրավոր նախազգուշացում.
- 2) տուգանք.
- 3) հեղինակագրման կամ լիցենզիայի գործողության կասեցում.
- 4) հեղինակագրման կամ լիցենզիայի գործողության դադարեցում:

«Տեսալսողական մեդիայի մասին» օրենքի 56-րդ հոդվածը սահմանում է.

«Սույն օրենքի 55-րդ հոդվածի 1-ին մասով սահմանված կարգով հայտնաբերված խախտումների առկայության դեպքում, եթե այլ բան նախատեսված չէ սույն օրենքով, ապա կարգավորող պետական մարմինն իրավախախտումը հայտնաբերելու օրվանից և (կամ) պետական այլ մարմինների կողմից իրենց իրավասությունների շրջանակում հայտնաբերված իրավախախտումների դեպքերի մասին տեղեկացվելու օրվանից ոչ ուշ, քան երկու ամսվա ընթացքում գրավոր նախազգուշացնում է խախտում կատարած անձին՝ պահանջելով վերացնել խախտումը և սահմանելով խախտումը վերացնելու համար ողջամիտ ժամկետ»:

Ելնելով վերոգրյալից և հիմք ընդունելով «Տեսալսողական մեդիայի մասին» օրենքի 49-րդ հոդվածի 5-րդ մասի, 55-րդ հոդվածի 1-ին մասի 1-ին կետի և 56-րդ հոդվածի դրույթները՝ Հեռուստատեսության և ռադիոյի հանձնաժողովը **որոշեց.**

1. «Էֆ ՆԵԹ» ՍՊ ընկերության նկատմամբ կիրառել վարչական տույժ՝ գրավոր նախազգուշացում՝ խախտումները հետագայում վերացնելու հանձնարարությամբ:
2. Սույն որոշումն ուժի մեջ է մտնում այն վարչական վարույթի մասնակիցներին պատշաճ ձևով հանձնելու օրվան հաջորդող օրվանից:
3. Սույն որոշումը կարող է բողոքարկվել ՀՀ վարչական դատարան՝ ուժի մեջ մտնելու օրվանից երկամսյա ժամկետում:

**ՀԵՌՈՒՍՏՍԵՍՈՒԹՅԱՆ ԵՎ ՌԱԴԻՈՅԻ
ՀԱՆՁՆԱԺՈՂՈՎԻ ՆԱԽԱԳԱՀ՝**

Տ. ՀԱԿՈԲՅԱՆ

22 հունիսի 2021թ.
ք. Երևան

